

Pak Lah beri amanat khas esok

BH - 8/5/2006

KUALA LUMPUR: Datuk Seri Abdullah Ahmad Badawi dijangka memberi amanat khas pada pertandingan akhir Pidato Perdana Islam Hadhari sempena sambutan ulang tahun Umno ke-60 di Dewan Merdeka Pusat Dagangan Dunia Putra (PWTC), malam esok.

Dijangka hampir 3,000 orang akan hadir memabitkan pemimpin dan ahli Umno di seluruh negara, wakil pertubuhan bukan kerajaan (NGO) dan pelajar institusi pengajian tinggi (IPT).

Pidato Perdana Islam Hadhari bertema "Islam Hadhari Menjana Keunggulan Ummah" adalah pertama kali dianjurkan Umno menerusi Bahagian Penerangan Umno dengan kerjasama Jabatan Kemajuan Islam Malaysia (Jakim), Jabatan Hal Ehwal Khas (Jasa) dan Yayasan Dakwah Islamiah Malaysia (Yadim).

Perdana Menteri yang juga Presiden Umno adalah penaung pertandingan itu yang dipengerusikan Ketua Penerangan Umno, Tan Sri Muhammad Muhd Taib.

Turut menganggotai jawatankuasa induk pertandingan, Ketua Pengarang Kumpulan The New Straits Times Press (NSTP), Datuk Hishamuddin Aun dan Pengarah Berita dan Hal Ehwal Semasa TV3, Datuk Kamarulzaman Zainal.

Pengerusi Jawatankuasa Pelaksana Pidato Perdana Islam Hadhari, Datuk Othman Desa, berkata pertandingan itu diadakan sebagai salah satu komitmen Umno menggerakkan Islam Hadhari yang menjadi teras pentadbiran kerajaan.

Beliau berkata, Umno juga mahu menjadikan Islam Hadhari yang diperkenalkan Perdana Menteri, menjadi pemacu dan pemangkin ke arah membina tamadun Melayu dan Islam yang unggul.

Katanya, pertandingan pidato itu juga adalah program khas bagi mempertingkatkan kefahaman ahli Umno mengenai Islam Hadhari dalam membangunkan negara dan rakyat menjadi bangsa cemerlang, gemilang dan terbi-lang.